

## 唐君毅先生像銘

唐君毅先生（一九零九至一九七八），四川宜賓人，幼承庭訓，以儒典啟蒙；及長游學南北，受教於歐陽漸、熊十力諸大師，遂能通儒釋之郵。先生精思明辨，出於秉賦，初治西哲之言即若鍼芥之投。所造既深，則於德意志辯證思維冥契尤多。平生以重振中國人文精神為己任，故治舊學新知於一爐，逐層為系統之建構，堂廡開闢，階次森然：道德自我之建立，其始基也；中國文化之精神價值，其全幅呈現也；心靈九境，其終極歸宿也。先生之學與年俱進，此其明徵也。

一九四九年先生參與新亞書院之始建而首創哲學系，迄一九七四年自中文大學講座引退，先後主持香港哲學壇坫二十有五年；濟濟多士出於門下者，極一時之盛。風雨如晦，花果飄零，神州哲理猶能續慧命於海隅，先生之功莫大焉。

先生講學不忘理亂，親歷世變，怒焉憂之，於是發憤返本開新，持孔子之教為天下倡，此海外新儒家之所由興也。新儒家之宗旨與規模定於先生所撰文化宣言，數十年來流佈海內外，駸駸乎與世運共升降，不亦卓乎！

明道救世，上承前哲；肫肫其仁，垂範後昆；仰瞻遺像，永誌勿忘。

公元二零零八年歲次戊子門人余英時敬撰

## 唐君毅先生立像記

唐先生君毅與諸賢創辦新亞書院，為新亞哲學系及香港中文大學哲學系創系系主任及首位講座教授，推動香港哲學教育，墾闢開荒，耕耘不息，中大哲學系蔚為中國哲學重鎮及當代新儒學中心，先生有大力焉。為感念其不朽建樹，中大哲學系校友會發動哲學系、新亞及中文大學校友捐款，值先生百歲冥壽及新亞書院與中大哲學系成立六十周年之際，為先生鑄塑銅像，以垂永紀。此議一出，迴響熱烈，並獲中文大學及新亞書院支持，矗立銅像於新亞校園。銅像由雕塑家朱達誠先生鑄製，銘文由新亞第一屆畢業校友、前新亞書院院長余英時先生撰寫，前中文大學藝術系系主任李潤桓先生揮毫。爰書片言，鐫於金石，以誌盛事。

香港中文大學哲學系校友會敬識  
二零零九年五月二十日